

**Okwukwo izi
ke Mbom
Pita
gbaru**

Nhne gbasiri okwukwo izi ka

Okwukwo izi ke Mbom Pita gbaru bu ke Pita gbaz-nennu ele Karaisi naata awnwhnu kwnornu be neekpenu Nyenwe aị. Pita kannu be nu agida ele ke Karaisi nowhnusni anya n'aka ele Rom ele kwege nu Jizosi Karaisi. Be jaazi koriri naata awnwhnu ke kakwo. Kovu, Pita naakanu be nu be nwe ndidi kwnornu nu kpakara ele sno Nyenwe aị jaata awnwhnu kwnornu okwnata ovu be. O kaa nu ka jeeme okwnata ovu be si rikne, ke jeenye Nyenwe aị igwugwu n'obochi Jizosi jaava.

Kovu kwnornu nhne Chiokike mernu hite n'ome Karaisi hi n'enwu lizo, kpakara ele Karaisi nwernu olile anya. Lele kpa Karaisi beru osno ta awnwhnu, omekwo, be nyee a igwugwu, o bu masi kpa nye Karaisi obula jeenwe igwugwu nga Jizosi jaava.

Nhne zi n'okwukwo izi ka

Obekwu ikwu nu okpukpe (1:1,2)

Risi olile anya aị (1:3-12)

Owu budnu zi nsọ lele ele ke Chiokike (1:13--2:17)

Nhne atụ awnwhnu Karaisi (2:18-25)

Awnwhnu nye Karaisi (3:1--4:19)

Ezni ele risi ogbako Chiokike (5:1-11)

Obekwu ikwu ipne-aznụ (5:12-14)

¹ Mawa, Pita, nye izi Jizọsi Karaịsi, naagbaz-nenu ele Chiokike hōhiaru ke gbasarụ kpakara ẹli Pōntosi, Galasia, Kapadosia, Esia nụ Bitinia ọkwukwo izi ka. ² Chiokike Nda mahiaru anụ, gweru aka a hōru anụ, bīta anụ nsọ hite n'Enine Nsọ, ma anụ noobnonu Jizọsi Karaịsi nsnị, ma ọvnrana a snụsnama anụ.

Oru nụ udno banụ anụ aba.

Olile anya ke zị bụdnu

³ Ọznarni zīnu Chiokike nụ Nda Nyenwe aị Jizọsi Karaịsi, nye hiri nụ obirizi a mūhia aị nụ bụdnu ikne. O mernu Jizọsi Karaịsi hi n'ẹnwu lizọ, ke nyernu aị ọkwadata ovu zị bụdnu. ⁴ A bna n'okehia mkpe ke zá noolulu olulu, nụ ke be mérula emeru, nụ ke zá nọbo ọbo, ke Chiokike bītannu anụ n'oligwe. ⁵ Chiokike jeeji iknernema a bīta anụ tem anụ nahia ọznohia, kwnornu nụ anụ tūkwasiri a ovu. O jeeme ka whūya iwhe n'ige ipne-aznụ. ⁶ Anụ nōonwudna ọnwudna kītna kwnornu ka, ọ bụ n'ezi nụ anụ naata awhnūwhnu zī ọdo n'odo n'ige matī ka. ⁷ Kpakara ọrnurna ka varụ ma be tule ọkwadata ovu anụ ma anụ zī snam lele kpa be neeji bẹkwnu naagba golu ke noolu olulu. O bụ kpa be neeji bẹkwnu nōotule ọkwadata ovu anụ, ma anụ nwehia ọznarni nụ igwugwu n'ọbochi be jookpume Jizọsi Karaịsi. ⁸ Nye anụ whnūrnū n'anya, ọ bụ n'ezi nụ anụ jīle anya anụ lawūru whnū a, anụ kweru nū ya, ọ bụ n'ezi nū anū jīle anya anū lawūru whnū a kītna. Kam kpayarū anū nwernu snarnīma k'agīda ke ọnu jọkowali. ⁹ Anū nahiaru nhne anū kwnatarū ovu ke bụ ọznohia ke mkpūru ovu anū.

¹⁰ Ka bụ ọznohia wam ele ọwhnurninya piosiri rikne, nyosna nhne gbasiri a, be whnurnu ọwhnurninya gbasiri nkesi wam Chiokike jeenye anụ. ¹¹ Be pioru ọ mahia ige wam nụ kpa ọ jọoburu bụ nhne Enine Karaisi ke zị nụ rime be kwuru, nhne gbasiri awhnūwhnu Karaisi jaata nụ igwugwu ke joosno a. ¹² Chiokike kpumennu ele ọwhnurninya ka nụ ọnu be búo ke be, kọvu ke jaabnanụ anụ iru, bụ ke be kwuru hite n'ọnu ele znirni anụ izi ọma, hite nụ rikne ke Enine Nsọ ke hiri n'oligwe va. Ka bụ nhne ke ele enine izi pioru o lebna anya nụ rime a.

Anụ ziri nsọ

¹³ Kam kpayarụ, anụ suru ajnị n'ovu anụ, anya dū anụ ẹli, anụ neele oru ke Jizosi Karaisi jeenye anụ anya nga be kpumernu a. ¹⁴ Lele rụmu ke noobnonu Chiokike nsni, anụ lánna nụ rime nhne ọjo ke nọogwnu anụ nụ mbom nga anụ zị lele ele máa nhne. ¹⁵ Tnụnuma, lele kpa nye wam sukwuru anụ zị nsọ, anụ ziri nsọ nụ kpakara nhne anụ neeme. ¹⁶ Kwnornu nụ be gbarụ a n'okwukwo nsọ, kaa, “Anụ ziri nsọ, lele kpa me zị nsọ.”

¹⁷ Ọ bụru nụ anụ noosukwu Nda ke zá neele badnụ anya n'ikpe, bụ nye neekpe badnụ ọbula lele kpa ọnu be jiri zị, anụ ziri bụdnū lele ele izne nọotu ogwnu n'owa ka. ¹⁸ Anụ magwụ nụ ọ búo golu mọbu siliva ke noolulu olulu bụ nhne be jiri gbahia anụ hite n'aka nhne ọjo ke anụ nahiaru n'aka ele nda anụ ọknani, ¹⁹ kọvu ọ bụ ọvnarna Karaisi ke zị okne ọnu ahia, lele nnwọ atnurnu ke nwée ọru mọbu ntupo. ²⁰ Chiokike hohiaru a tụtụ sụ ọ tụtụ ntụ-ẹli ọwa. Kọvu o mernu a ọ whuya

iwhne n'òbochi ipne-aznụ ka kwnornu anụ. ²¹ Anụ kweru nụ Chiokike hite nụ ya, nye o mernu ma o hi n'ẹnwu lizo, nyee a igwugwu, ma olile anya anụ nụ ọkwnata ovu ziri nụ Chiokike.

²² Hne anụ bítaru ẹhni anụ snam hite n'obno nsni n'ezi ọka, nọowhnu ele kweru ekwe n'anya, anụ gweru ọwhnun'anya ke hi n'ovu anụ whuya whnụ ibne anụ n'anya. ²³ Be mụrnu anụ berere, ọ búo hite nụ mkpuru ke nooro oro, kovu hite nụ mkpuru ke zá nooro oro, ke bu ikwu-ọnu Chiokike ke zị ọkwnukokwnu. ²⁴ Ọkwukwo nsọ kwuru, “Kpakara badnụ nụ lele achara,

igwugwu badnụ nụ lele okoko achara,
achara chanwu, okoko a dnahala,

²⁵ kovu ikwu-ọnu ke Nyenwe aị jaazi ọkwnukokwnu.”

Ka bu ikwu-ọnu ke izi ọma wam be znirni anụ.

2

¹ Kam kpayaru, anụ gweme kpakara nhne ojo n'ẹhni anụ, irno, nụ kpakara aghigho, nụ ruwhnu lawuru, nụ okwno-awuwa nụ ọkaja. ² Lele rumu be mụrnu ikne, akpiri ke mini-remá ke zị snam ke enine, ke bu ikwu-ọnu Chiokike nọokpo anụ bẹkwnu, ma anụ nwọ a, sopiya nụ badnụ dụ ọznohia. ³ Kịtna, anụ raturu a riro whnụ nụ Nyenwe aị bụru ọma.

Akaworugwu zị budnu

⁴ Anụ vakwnusi Nyenwe aị lele rugwu ke zị budnu ke ele badnụ juru, kovu ke Chiokike hohiaru, zị okne ọnu ahia n'anya a. ⁵ Anụwa masi, lele akaworugwu ke zị budnu, be jiri anụ wu Oro Nso ke enine, ma anụ bụru ele ọkwa ariohna zị nsọ, ele

jaakwa ariohna enine ke Chiokike jaanarnu hite nu Jizosi Karaisi. ⁶ Be gbaru a n'okwukwo nsọ, kaa, “Le, m bitaru m nu rime Zayoni, akaworugwu nsukala ọro me hohiaru ke zi okne onu ahia, nye obula ke tukwasiri a ovu, iwhnerne jootu a.”

⁷ Nu hne anu ele kweru ekwe zi, akaworugwu ka zi okne onu, kovu hne ele kwé ekwe zi, be gbaru a n'okwukwo nsọ, kaa, “Akaworugwu ke ele noowu ọro juru, kiyam gholam risi nsukala ọro.”

⁸ Be gba kwno,

“Akaworugwu ke jeeme badnu kpobi ọchi, nu rugwu ke jeeme be dna.”

Be dnarnu kwnornu nu be kwége ikwu-onu Chiokike, lele kpa echiche Chiokike zinu be.

⁹ Kovu anu bu ele Chiokike jiri aka a hohia, ele ariohna ke eze, mbam ke zi nsọ, ele ke Chiokike, ma anu gesi oznarni nye wam sukwuru anu hite nu rime ochichiri bna nu rime iwhne a zi igwugwu.

¹⁰ Nu mbom anu buo ele ke Chiokike, kovu kitna, anu bu ele ke a, ele nwée obirizi nu mbom, kovu kitna, Chiokike donnu anu obirizi.

¹¹ Ele me whurnu n'anya, m naariasno anu, lele ele izne nu ele neewhe ewhe n'owa ka, anu nyée nhne ojo ke nọogwnu anu, ke nọolu masi ogwnu megidne mkpuru ovu anu oghere. ¹² Anu wu budnu ke buru oma n'esilawuru ele máa Chiokike, ọ bu n'ezi nu be noobno anu nhne ojo, kovu be whnu ernalu oma anu, ma be znarni Chiokike n'obochi o jeelekasi ai.

*Bịta ẹhni anụ nụ mkpururu
ele ọchichi*

¹³ Kwnornu nụ Nyenwe aị, anụ bịtá ẹhni anụ nụ mkpururu ọchichi ke badnụ, mọbu eze, lele nye risi, ¹⁴ mọbu ele ọchi ẹli ele o ziyaru ọ ta ele ọjọ awhnụwhnu, nụ ọ znarnị nye neeme nhne ọma. ¹⁵ Ka bụ nhne Chiokike noopio, ma anụ hite n'ẹrnu ọma anụ kpusni ọnu ele iwahnirniwhno. ¹⁶ Anụ wu bụdnu lele ele nwernu ẹhni be. Anụ jí ọnodi wam kpusni nhne ọjọ, kọvu anụ ziri bụdnu lele ele izi Chiokike. ¹⁷ Anụ sọ kpakara badnụ anya, anụ whnụ rụmu Nda n'anya, anụ tų ogwnu Chiokike, anụ sọbisinu eze.

Awhnụwhnu Karaịsi

¹⁸ Ele ọhi, anụ gweru ọso anya bịtá ẹhni anụ nụ mkpururu ele nwe anụ. Anụ ménu nye ovu ọma nụ nye udno kpọi, ma nye aka rikne masi. ¹⁹ Kwnornu nụ Chiokike jọgozi anụ ọ bụru nụ anụ tarụ awhnụwhnu hne ọ zá nhne ọjọ anụ mernu, kọvu kwnornu nụ anụ tųru ogwnu Chiokike. ²⁰ Ndaa igwugwu ke anụ jeenwe, ọ bụru nụ anụ tarụ awhnụwhnu kwnornu nụ nhne ọjọ anụ mernu? Kọvu anụ gwuzogidne n'awhnụwhnu hne anụ mernu nhne ọma, Chiokike jọgozi anụ.

²¹ Ọ bụ nhne be sukwuru anụ, Karaịsi tarụ awhnụwhnu nụ risi anụ, ghasanụ anụ nhne atụ, ma anụ snornu rẹnu ọchi a.

²² “Ọ zá mmehie o mernu,
ọ zá aghịgho be piohịaru n'ọnu a.”

²³ Nga be mernu a nhne iwħnerne, o mégwarnuge, nga ọ tarụ awhnụwhnu, ọ kpála rikne, kọvu o gweru ẹhni a yisi n'aka nye wam

neekpe ikpe bụru ọma. ²⁴ Ya n'iwhuru a jiri ẹhni a vuru kpakara mmehie aị n'olu ọgba, ma a bụru ele nwurnu ọnwu ghasa mmehie, ziri bụdnu ele mee mma. O jiri ẹnya a gwo kpakara ẹhni igbugbu aị. ²⁵ Anụ nụ lele atnurnu ke whuru apna, kovu ke hiehnarnu hne Nye Ọznuznu nụ Nye Risi mkpuru ovu anụ zi.

3

Ele nzi nụ nnwerne

¹ Kpam masi, anụ ele bụ nnwerne, anụ bita ẹhni anụ nụ mkpururu nzi anụ. O bụrubedi nụ be bụ ele kwéle ikwu-ọnu Chiokike, be jeenwe rikne hiri nụ agwa ọma anụ kweru hne anụ kwúle ọka, ² kpa be jowhnu anụ noowu bụdnu bụru ọma ke zi masi snam n'oso n'anya. ³ Anụ kwé mma anụ bụru nhne ke anya nọowhnu kpọi, ọ bụo kpa anụ kparụ risi anụ, mọbu golu anụ tū n'ẹhni, mọbu iwo marnụ mma anụ wogwu. ⁴ Kovu mma anụ bụru agwa ọma wam tugwaru otugwa ke zi nụ rime ovu, ke bụ nhne ẹyi ke zá nooro oro, ke bụ ọzi wọhnerne nụ enine ke udno, ke zi okne ọnu ahia n'anya Chiokike. ⁵ O bụ kpa ele rinya gbaka zi nsọ ele tükwasiri Chiokike ovu mernu ẹhni be mma, be bítaru ẹhni be nụ mkpururu nzi be. ⁶ Sera nụ kpam, o bnonnu Eberham nsni, noosukwu a, “Nyenwe m.” Anụ bụ rụmu a rinya, ọ bụru nụ anụ jeeme nhne ọma gharụ ọ tū ogwnu nhne ọbula.

⁷ Kpam masi, anụ ele bụ nzi, anụ jiri ọso anya nụ akọ, anụ nụ nnwerne anụ wuru, hne anụ magwu nụ be bụ ele nwé rikne. Anụ nụ be jeekehia nkesi bụdnu kwó okwo Chiokike neekesi anụ n'etekne.

Anụ mee kpam, ọ zị nhne ọbula bnosni okpukpe anụ.

*Awhnụwhnu kwnornu
ome nhne buru ọma*

⁸ N'ipne-aznụ, kpakara anụ nwe otu ovu, anụ donu ibne anụ obirizi, anụ whnụ ibne anụ n'anya lele rụmu nda, anụ nwe obirizi n'ehni ibne anụ, anụ buru ele be gwednarnụ ẹli. ⁹ Anụ jí nhne ọjọ kwuhnata nhne ọjọ, anụ gógwna ngugo, kọvu anụ nọogozị ọgozi, kpa Chiokike sukwuru anụ ma anụ kehia ngozi masị. ¹⁰ Kwnornu nụ ọkwukwo nsọ kwuru,

“Nye ọbula ke whnurnu budnu n'anya,
ke noopio ọbochi ọma,
ọ bita ọnu a ma ọ gharu o kwu ọka ọjọ,
bita masị mgbele-ọnu a n'aghalaghala.

¹¹ Ọ gharu nhne ọjọ, mee nhne buru ọma,
pio udno, gbasno a.

¹² Kwnornu nụ anya lawuru Nyenwe aị zị n'ehni ele mee mma,
nsnị a nọonu okpukpe be,
kọvu ruwhnu Nyenwe aị neemegidne ele neeme
nhne ọjọ.”

¹³ Nyele jeemejọ anụ, ọ buru nụ anụ gwuzosi rikne nụ nhne ọma? ¹⁴ Ọ buru nụ anụ ta awnụwhnu kwnornu nụ anụ mernu nhne ọma, ovu sọ anụ n'ọnu, ogwnu tú anụ kwnornu be, ovu lákwadia anụ mini.

¹⁵ Anụ sọbisinu Karaịsi lele Nyenwe aị nụ rime ovu anụ. Anụ jiknernu ọ sa ajiji nye ọbula jaasikwa anụ nhne gbasiri olile anya wam zị n'ovu anụ hite n'ọso anya nụ ovu zị wọhnerne. ¹⁶ Anụ bita ovu anụ snam, ma ele nookwu nhne ọjọ kwnornu

agwa ọma anụ kweru nụ Karaisi, iwhnerne jootu be nụ nhne ojo be nookwu. ¹⁷ Ọ ka mma, ọ bụru nụ ọ bụ echiche Chiokike nụ anụ taru awnụwhnu kwnornu nụ anụ mernu nhne ọma karu kwnornu nụ anụ mernu nhne ojo. ¹⁸ Karaisi nwurnu otu mgba kwnornu mmehie aị, nye ikpe mána nwurnu kwnornu ele ikpe marnu. Karaisi mernu ka ma o duru anụ dụ hne Chiokike zị. Ọ nwurnu ẹnwu n'anọ-ẹhni, kọvu ọ zị budnu n'Enine, ¹⁹ nụ rime enine zị budnu,* o znernu zni ele enine ke zị n'oro ikelu izi ọma. ²⁰ Ka bụ ele zá noobno nsni, kpa Chiokike ji nkasi ovu neese nga Noa nọtutu ogbo ke be jiri znọhia badnu ele nụ ele, badnu ẹsato kpọi hite nụ mini. ²¹ Ka neegesi nụ ọwu mini znọhiaru anụ, ke bụ nọorio Chiokike ovu zị snam hite n'olizọ n'ẹnwu ke Jizọsi Karaisi. Ọ búo ọsnuma rune ke ẹhni. ²² Karaisi bụ nye laru oligwe daziri ẹli n'akarikwnunga Chiokike, hne kpakara ele enine izi nụ ọchi risi nụ rikne zị nụ mkpururu a.

4

Owunu Chiokike budnu

¹ Kpam masi, Karaisi taru awnụwhnu n'anọ-ẹhni a, anụ jiknernu o mee kpam masi, kwnornu nye taru awnụwhnu n'anọ-ẹhni a zịma neeme mmehie. ² Kam kpayaru, ọ zá noowu budnu a n'owa ka lele kpa agwnurnu nhne ojo ke badnu, kọvu lele echiche Chiokike. ³ Kwnornu nụ ige anụ tuwhuru n'ige wheru ewhe noowu budnu lele ele máa Chiokike zulem. Ige wam anụ noowu budnu ke zila richna, agwnurnu nhne ojo, ọnwọ manya,

* **3:19** hite nụ Enine Nso

okne otne eri, nụ ọkwa ọnwu. ⁴ Kịtna, o jiri be anya nụ anụ zá noosno be neeme nhne ọjọ berere, ke kpayarụ be ọovu anụ ọnu. ⁵ Kọvu be jaasa ajiji gbasiri ẹhni be nụ ruwhnu nye wam jeekpe ele zị bụdnu nụ ele nwurnu ọnwu ikpe. ⁶ Kam kpayarụ, be jiri zni ele nwurnu ọnwu izi ọma nga be zị, ma be kpe ikpe be hite nụ nhne be mernu nga be zị bụdnu lele badnụ, ma be ziri bụdnu n'enine lele Chiokike.

⁷ Mbimambi kpakara nhne zị ndundu. Anụ nwe anya udno, anya dụ anụ ẹli, anụ neekpe okpukpe. ⁸ Ke kakwo, anụ nwe ọwhnun'anya zị omimi n'esilawuru anụ, kwnornu nụ ọwhnun'anya nookpusni agịda mmehie. ⁹ Anụ jí ntamu nabnanya ibne anụ. ¹⁰ Nye ọbula gweru nkesi ọ nahiaru n'aka Chiokike znenu ibne a izi, gweru okwesi ọkwnata ovu neekesi oru Chiokike zị ọdo n'ọdo. ¹¹ Nye neezni izi ọma, ọ zni a lele nụ ọ bụ ikwu-ọnu ke hi n'ọnu Chiokike whụya. Nye neezne izi, o mee a lele Chiokike nyernu a iknernema, ma be znarni Chiokike nụ rime kpakara nhne hite nụ Jizọsi Karaịsi, nye nwe igwugwu nụ rikne tim tọm. Amim.

Awhnụwhnu lele nye Karaịsi

¹² Ele me whnurnu n'anya, ọ gbagwoji anụ anya kwnornu ọrnurna zị igbugbu ke naarna anụ lele nụ ọ bụ nhne ikne neeme anụ. ¹³ Kọvu anụ nwudna, kwnornu nụ anụ sno Karaịsi takọ awhnụwhnu, ma anụ nwe ovu ọso n'ọnu zị agida nga be jookpume igwugwu a. ¹⁴ Ọ bụru nụ be mernu anụ nhne iwhnerne kwnornu nụ ọwhna Karaịsi, ovu sọ anụ n'ọnu, ka neegesi nụ Enine

igwugwu, ke bu Enine Chiokike wu nu rime anu.
¹⁵ O za nye ta awnwhnu n'esilawuru anu lele nye gburu badnu, mabu nye buznu, mabu nye mernu nhne ojo berere, mabu nye neelebna anya nu nhne gbasi a. ¹⁶ Kovu, o buru nu nye obula ta awnwhnu lele nye Karaisi, iwhnerne toko nye wam, kovu o nyee Chiokike oznarni kwnornu nu be nookwu a nye Karaisi. ¹⁷ Ige vaem nga be jaapanizo ikpe n'ezinuro Chiokike. O buru be panizo ikpe nu hne a zi, ndaa kpa o jaazinu ele kwele izi oma Chiokike?

¹⁸ O buru nu o jaara ehni o znohia ele mee mma, ndaa hne ele ma Chiokike nu ele mmehie jaazi?

¹⁹ Kam kpayaru, nye obula ke naata awnwhnu lele kpa echiche Chiokike jiri zi, gweru ovu oma yisi ehni a kpa kpa n'aka Nye Okike nye kwesiri okwnata ovu. Nye wam zne nu ruwhnu neeme nhne oma.

5

Ele okno badnu nu ele ikoro

¹ M naariasno ele okno badnu zi n'esilawuru anu hne me bu masi nye okno badnu, m whnuru m awnwhnu Karaisi taru, m jeekehia masi igwugwu a nga be jookpume a. ² Anu znu atnuru Chiokike ke zi nu mkpururu anu, neelegidne be anya nu kpakara ovu anu kpa Chiokike piuru a, o buo nu mkpa kpagwu anu, kovu kwnornu nu o bu nhne kwesiri omume. Anu rnu ernu anu, o buo kwnornu iru anu jeenwehia, kovu nu o nhne zi n'ovu anu n'omume. ³ Anu mee be lele nu be

bụ nhne ke aka anụ, kọvu anụ buru nhne atụ be joosno. ⁴ Nga Nye Risi Ọznuznu Atnurnu varu, anụ jaanahia okpu-eze zị igwugwu ke jaazi noonwu va-a-a tem.

⁵ Kpam masi, rụmu ikoro, anụ b̄ita ẹhni anụ nụ mkpururu ele okno badnụ. Kpakara anụ woru ọzi w̄ohnernerne n'ovu lele iwo, neeznenu ibne anụ izi. Kwnornu nụ ọkwukwo nsọ kwuru,

“Chiokike noogwuzogidne ele oknomokno,

kọvu o neenye ele zị w̄ohnernerne n'ovu oru.”

⁶ Kam kpayarụ, anụ gwedna ẹhni anụ nụ mkpururu aka dikne ke Chiokike, o joovulizọ anụ olu n'ige ke a. ⁷ Anụ vukwnusi a kpakara mkpa anụ, kwnornu nụ nhne gbasiri anụ neemetụ a n'ovu.

⁸ Anya dū anụ ẹli, anụ neese nse, nye irno anụ bụ Ekwensu, naagbaghari lele odum n̄ogbo ọgbugbo noopio nye o jeeri. ⁹ Anụ ziri kwem nụ ọkwnata ovu anụ, anụ gwuzogidne a, kwnornu nụ rụmu Nda anụ nụ kpakara ọwa naagawhe otu awhnūwhnu wam.

¹⁰ Nga anụ taru awhnūwhnu ige matị, Chiokike ke oru nye sukwuru anụ bna n'igwugwu a kwó okwo nụ Karaisi, joogwuzote anụ, nyee anụ rikne, gba anụ inwe. ¹¹ Kpakara rikne ọchichi bụ ke a ọkwnukokwnu. Am̄im.

Obekwu ipne-aznụ

¹² Saịlasi nwene aị rukna ke kwesiri ọkwnata ovu yinnu m aka gba ọkwukwo izi matị ka, m naariasno anụ naagba akebe nụ ka bụ ezi oru Chiokike n'olu hne anụ gwuzo. ¹³ Ọgbako Chiokike ke zị nụ Bab̄iloni,* ke be h̄ohiakoru anụ nụ ya neebekwu

* **5:13** Ka bụ Rom

anụ, ma Makị nnwọ m. ¹⁴ Anụ gweru ọwhnun'anya
Karaịsi neebekwu ibne anụ.

Udno dazịnu kpakara anụ ele zị nụ rime Karaịsi.

Tesitamenti Ikne n'O_{nu} Ikwere **New Testament in Ikwere**

copyright © 2010 Wycliffe

Language: Ikwere

Translation by: Wycliffe

Ikwere – (ikw) Nigeria

The Iwerre language of Nigeria can also be spelled Ikwere and Ikwerri. This language is spoken primarily by the Ikwere people who live in the Rivers State of Nigeria and is one of the many ethnic groups in the Niger Delta. There were more than 23,000 speakers of this language in 1973. There is also a considerable local interest in literacy and grammar.

Copyright Information

© 2010, The Nigeria Bible Translation Trust. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789076369

New

The New Testament

in Ikwere

© 2010, The Nigeria Bible Translation Trust.
All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 11 Nov 2022 from source files dated 29 Jan 2022

c17ee3a1-1c7a-5c05-8e0f-5043e8228d89